
Fra: Ture Andersen <ture.andersen2@bkkfiber.no>
Sendt: 8. januar 2016 19:29
Til: Postmottak Meland
Kopi: age.andersen@lyse.net; brita.sagstad@bkkfiber.no;
knut.sagstad@bkkfiber.no; kaleive@online.no; Jan Gismervik;
cato.rasmussen@sksk.mil.no; takst.einar.bratland@broadpark.no;
anordal@online.no; edvard.ingolf.urdal@gmail.com; guva56@gmail.com
Emne: NY KLAGE - Flytting av oppdrettsanlegg i Herdlefjorden

NY KLAGE – ARKIVSAK 15/1419 – Flytting av oppdrettsanlegg i Herdlefjorden

Underskrivne syner til min første klage, dagsett 10.11.15. Mine vurderingar i denne klagen står framleis ved lag.

I tilsendt post frå Meland kommune, fekk eg i dag den 08.01.16 nye sakspapir samt konsekvensutgreiing frå firmaet Akvator : « Konsekvensutgreiing – endring av anleggsplassering. Dispensasjon frå kommuneplanen «.

Då kan ein slå fast at dette er 3. forslag til plassering av den tenkte flyttinga av anlegget på Laksevika.

Forslag 1

Bandleggja eit areal som går frå Børgavlen og om lag midtfjords i den trafikkerte Herdlefjorden – og som tangerar KVIT SEKTOR frå fyrlyktene på Askeneset og Heggerneset.

Forslag 2

Bandleggja eit areal på 90 dekar (tredobling i høve til Laksevika) som går frå Børgavlen og om lag 300 meter frå land.

Forslag 3

Flytta anlegget om lag 500 meter lengre sør-aust til Trollhola – 600 meter frå busetnaden i bustadfeltet Dalemarka.

Meland kommune og konsultentselskapet Akvator opplyser at grunnen til flytting frå alternativ 2 til alternativ 3 er nye opplysningar om « biologisk mangfald «.

Denne klagaren tykkjer det alltid er best å « spela med opne kort « - kvifor kan ein ikkje opplysa ålmenta kva dette biologiske mangfaldet er ? Få kjenner vel dette området betre enn underteikna som har ferdast her sjøvegen sidan 1940-talet.

- Er det den store kolonien av skarv som har fast tilhald på nordsida av Børgavlen (dette er vel ikkje biologi men zoologi) ?
- Er det kusymra som veks på eit platå mellom Børgavlen og Børo – og som vart slåtta av ho Rangela i Sveitsarhuset på byrjinga av 1900-talet – graset hadde ho i baksuten på færingen ?
- Eller er det noko nytt og ukjend for oss innfødde lenger sør; der ein først finn Stora-Kjeura og så Litla-Kjeura ?

Dette 90 dekar store anlegget er tenkt plassert utan for « Kjerringanaustet » som er ei kjempestor steinhelle som støttar seg inntil fjellet ; og utgjer eit stort hólrom som nærast er tørt i regnvér. Går ein tilbake 60 – 70 år i tid, så var denne staden opphaldsplass for båt-splinten frå Rogaland i sommarhalvåret.

Her er det fint å leggja til med småbåt, og eg ser ofte at båtfolk oppheld seg her for grilling og andre aktivitetar.

Dette oppdrettsanlegget er føreslege plassert rett utanfor Kjerringanaustet.

Meland kommune har regulert Holmeknappen til kulturvernområde – noko som verkar sterkt inn på dei byggjeplanar me innfødde måtte ha. Her ligg også Holmestova frå kring 1550, og Sjøbua Museum – som underskrivne saman med ein mann frå Flatøy fekk etablert (samla inn og registrerte eksemplar av dei gjenstandar og båtar dei gamle strilane hadde til rådvelde for fiske og fangst i eldre tider).

Frå Knappen vert eit anlegg utanfor Kjerringanaustet godt synleg – og vil såleis « forureina » visuellt frå den staden som var det største senteret i Meland kommune for 60 år sidan – den gong dampbåten var i drift.

Til slutt vil eg koma med eit hjartesukk om ei stor undring i mitt hovud :

Ved innløpet til Herdlefjorden i sør-aust (nær tenkte siste plassering av anlegget), kjem Salhusfjorden med kloakk frå Knarvik, Frekhaug og Salhus og møter kloakken frå den nest største byen i landet. Denne oppdrettsfisken vert såleis ståande i slikt forureina vatn i fleire månader- før han vert sendt ut på marknaden.

Den andre enden av Herdlefjorden er også meir enn mindre stengd av øya Herdla. Det er ein trong passasje i nord kalla « DE NAUA » (tyder trongt) og det endå trongare Herdlesundet.

Avisa Bergens Tidende hadde eit stort oppslag for mange år sidan ; der dei kunne fortelja at Herdlefjorden var så forureina av kloakk at ein burde fara nordom Fløksand for å fiska – kunne forskarane fastslå.

Sjølvsagt har underskrivne teke konsekvensen av slik informasjon : Eg fiskar berre på såkalla « ferdafisk » i Herdlefjorden.

Eg registrerer at firmaet Akvator brukar eitt av mine private bilete frå Holmeknappen (der dampskipet « Varden » ligg til kai rett før siste verdskrig) i si konsekvensutgreiing – utan å ta kontakt med meg i det heile. Dette vil eg sjølvsagt koma tilbake til både ovanfor Meland kommune og Akvator.

Holmeknappen, den 08.01.16

Ture Andersen

Sendt fra [E-post](#) for Windows 10

Fra: [Ture Andersen](#)

Sendt: tirsdag 10. november 2015 kl. 16.40

Til: postmottak@meland.kommune.no

Emne: Klage - flytting av oppdrettsanlegg i Herdlefjorden

KLAGE – FLYTTING AV OPPDRETTSANLEGG I HERDLEFJORDEN

Underskrivne er ein mann på 73 år, og har drive fiske til eige forbruk her ved Holmeknappen sidan eg var liten gutt – med unnatak av 11 år då eg budde andre stader i landet.

Då dette oppdrettsanlegget vart etablert på Laksevika, førde det til stor endring for oss fritidsfiskarar. Før kunne me få eit par pigghaar når me hadde line nede på 200-300 meters djupne ved Holsberget. I dag kan me knapt ha fiskereiskap i sjø grunna stor pigghå.

Eg freista å setja ut eit lyragarn sist for tre år sidan på 30 meters djupne på nordsida av Knappen. Det resulterte i om lag 70 kg med stor pigghå. Jamvel greidde ein av desse ufyselege fiskane å stikka meg, så eg til slutt måtte oppsøkja lege med opphovna hand (det er gift i piggane på ryggen). Pigghåen skal visstnok no vera freda.

Medio oktober i år hadde eg ute fire krabbeteiner her ved Knappen. Pigghåen hadde vore inne og laga fleire hòl i heilt nye teiner.

Det einaste fisket me kan driva med, er dorging med årabør etter lyr om hausten. Men kona skvatt i robåten då ho trudde dorga var fast i botn nordom Børgavlen ; men eg visste at det var 200 meters djupne der, og at fangsten var ein stor pigghå.

I fjor fekk eg fleire makrellar som var fleire kilo tunge – truleg ete seg feite ved oppdrettsanlegget. Desse måtte sjølvstast. No har eg flytta fiskebåten min til lo ; og fiskar i området ved Herdla. På Knappen er det håplaust å fiska.

I vedtaket frå UDU ser eg at kommunen krev konsekvensutgreiing. Ja, dette er konsekvensar for meg, ved å ha eit oppdrettsanlegg på Laksevika.

Om dette anlegget vert flytta til Børgavlen rett sørom Knappen og gjort tre gongar større, vert nok konsekvensane for oss fritidsfiskarar truleg endå større enn i dag.

På den positive sida ved flytting av anlegget til Holsberget, vil eg nemna følgjande : Det er elendige hamneforhold på Holmeknappen særleg i vinterhalvåret. Vonaleg vil ei slik plassering kunna dempa ned uvér som kjem frå sør.

Til slutt vil eg nemna eit underleg djupne-fenomén tett inntil Børgavlen. Ser ein på dei siste utgåvene av sjøkart, så forsvinn plutselig fleire djupne-kotar i « lause sjøen » (eg tok kystskippar-eksamen for to år sidan , så eg har litt peiling på slikt). Eg har vore nær land med ekkolodd som sler 300 meter ned ; men fann ikkje botn. Sjølve Børgavlen er så slett som « støp », og legg ein seg heilt inntil fjellet , ser ein at dette går innover mot djupna.

Min teori er at det er ei svært djup hòle som delvis går innunder Børgavlen og delvis rett utom neset. Det er utanfor denne « hòla » og ut mot fjorden at oppdrettsanlegget er tenkt plassert.

Stadnamnet Børgavlen kjem av « Børo » som ligg eit par hundre meter lengre sør (ho ser ut som ei høybøre – berre så mykje større). Børgavlen tyder altså den rette fjellveggen (gavlen) som ligg nær Børo.

Me finn dette namnet att på Herdla : Herdlegavlen.

Holmeknappen, den 10. november 2015

Ture Andersen

Sendt fra [E-post](#) for Windows 10